

Kieliraatin meänkielikuulumisia

Kieliviestissä on kymmenen vuotta ollu matkassa pieni osa, jossa päästethään meänkielisiä artikkelia. Meänkielisen osan retaktöörinä aikasemmin oon olheet Harriet Kuoppa, Regina Veräjä ja Inga-Britt Uusitalo. Artikkelia oon kirjottanheet ajan saatossa monet muutki kirjottajat, jotka oon tänäki päivänä aktiivisia ja tekevät työtä meänkielen kans. Vuesta 2019 lähtein Kieliviestin meänkieliset artikkelit oon pantu kans Isofin kotisivule, niin ette net mennee lukea vaikka ei oliskaan prenymeerannu itte aviisia. Joitaki artikkelia oon kans käänetty ruottiksi. Tämä oon tämän vuen viimeinen Kieliviesti. Samala tämä oon neljäs Kieliviesti jossa mie olen ollu retaktöörinä. Tämä alku Kieliviestin kans oon ollu oikein hauska ja mielenkiintonen. Jos sulla oon toihveita Kieliviestin artikkelista eli haluaisit itte kirjottaa jostaki kiehleen ja kielenhuoltoon liittyvästä teemasta, niin ota yhtheys ja selitä sinun itea!

Yhestoista päivä marraskuuta 2019 Isof ja Kieliraati järjestit meänkielen seminaarin Uppsalassa. Seminaaripäivä oli oikhein mukava ja lykästynny. Meininki oon ette seminaari järjestethään kerran vuessa ja ette sen paikkaa vaihetethaan. Nyt ensimmäiselä kerrala Uppsalassa paikala oli yhtheensä 76 ihmistä ko met laskema kans sen pienimän viehraan jo ei ollu vielä täyttäny ees puolta vuotta ja kans net UR:n työntekijät jotka olit paikan päälä

filmaamassa. Ohjelmassa oli esitelmiä ja keskusteluita meänkielen tialektista, minuriteetikielityöstä Luulajan kunnassa, meänkielen aktiviteetista Uppsalassa ja Tokholmissa, ja sitte kans nuorten raahvaitten kokemuksia siitä minkälaista oon oppia meänkieltä. Saima kans kuula mitä Isofissa oon menossa just nyt ja minkälaista materiaalia Isofin kansanperintheen arkkiiivissa oon. Tässä seminaarisassa osa ohjelmasta oli ruottiksi ja osa meänkielälä. Yks esitelmistä oli kvääninkielinen filmi. Siinä kväänin kielen ekspertti Anna-Kaisa Räisänen selitti kväänin kielen tilantheesta ja olletikki revitaliseerinkiotheista Porsangin kunnassa Norjassa. Hänen rypriikki oli semmonen johon moni haluais saaha vastauksen: ”Kunka saaha lissää puhujia pienele kielele?”. Tässä Kieliviestin numerossa sie saati träänata vähäsen kväänin kieltä ja lukea Anna-Kaisan esitelmän. Artikkelin norjankielisen käännöksen löyät kans vepiltä. Muut seminaarin esitelmät tullee UR:n kotisivule hiljemini ens vuen puolela.

Oikein hyvää loppuvuotta kaikile Kieliviestin lukijoile ja kans mukavaa ja rauhalista semestinaikaa jos teilä semmonen oon tiossal! Muista seurata meän kotisivua isof.se/meankieli ja sosiaalista meetiaa [instagram.com/kieliraati](https://www.instagram.com/kieliraati). 📌

Kirjottaja oon meänkielen kielenhuoltaja Kieliraatissa.